

« A tous ceulx qui ces lettres verront. Guillaume Seigneur de Tignonville chevalier conseiller chambellan du Roy messire et garde de la prevosté de Paris salut. Savoir faisons que nous l'an de grace mil CCCC et cinq le mercredi vint jours de janvier, verifiees unes lettres scellees du scel de la prevosté de Paris contenant la fourme qui s'ensuit. A tous ceuls qui ces presentes lettres verront Hugues Aubriot garde de la prevosté de Paris salut. Savoir faisons que par devant Jehan Ferrebont et Vincent Chaon clers notaires jurez du Roy messire de par luy establis en son chastellet de Paris furent presens en leur personnes honorable homme et saige maistre Jehan Pastourel advocat du roy messire en son parlement a Paris soy disant avoir droit et charge en tous les heritages de feu Guillaume le Truant pour lui et en son nom d'une part et Jehan le Truant escuier frere de par pere du dit feu Guillaume en son nom et pour lui et en faisant et portant fort en ceste partie de Clement le Truant son frere germain par lequel il promest faire ratiffier passer et accorder par lettres et soubz scel autentique quant mestier sera et de par le dit maistre Jehan en sera requis toutes les choses en ces lettres contenues d'autre part. Disant et affermant icellui maistre Jehan pour verité que comme par vertu et certaine obligacion que il comme aiant cause de feu Regnault Noel et Jehanne jadiz sa femme et apres femme de feu Perre Godeffroy et des hoirs et aians cause d'iceulx feu Regnault et Perre avoit sur ledit feu Guillaume le Truant et sur ses biens et heritages pour certaines rentes de blef et de plusieurs arrerages qui en estoient deubz , et de decrez sentences et aultres justes tiltres. La maison et tous les biens heritages et possessions de icellui feu guillaume assiz a trembloy et au terroir d'environ feussent et soient a present au dit maistre Jehan. Lesquels heritages le dit Jehan le Truant disoit avoir aucune et certaine porcion en ce qui touchoit le douaire de sa mere derrement femme de son pere, et pere du dit feu Guillaume et en la presente et ce quil disoit lui estre venu de son dit pere et autrement. Amablement par voye admiabile causie et reservee par le dit maistre Jehan l'obligacion qu'il dit avoir et sa poursuite. Les dites parties recongnurent et confesserent qu'ilz avoient et ont entre eulx faiz et accorder les partaiges et divisions desdits heritages et possessions par la fourme et maniere quil sensuit. C'est assavoir que au lot et partie dudit maistre Jehan est esheu et demeurent sont et demoureront sienz les heritages et possessions cy apres divisez. Premierement sept arpens et demy de terre en une piece assiz en Saillevert en Fosse. Item neuf arpens et trois quartiers de terre au lieu dit Sainte Moyenne. Item sept arpens et demy au Cloz Guerin. Item trois arpens et trois quartiers, que terre et pré et saulsoye assiz aux Ruisseaulx, tout ce que dit est tenu en fief de Boort de Nantouillet. Item deux arpens et trois quartiers de terre au Buisson Bourdon. Item quatre arpens au dessoubz du Luat. Item sept arpens et demi de terre au coing de la Voie du Piege. Item deux arpens trois quartiers de terre au lieudit Beliait. Item deux arpens de terre au chemin Saint Denis. Item deux arpens et demy a la Croix Blanche. Item deux arpens et trois quartiers de terre, a l'Ourme Benoist. Item arpent et demy de terre aux Plastrieres. Item cinq arpens de terre au lieu dit au Fons Gribeval, les dictes terres a cens de reverend pere en dieu monseigneur l'abbé de Saint Denis. Item deux arpens de terre au lont du chemin de Dampmartin. Item un quartier de saulsoye compte pour un arpent assiz sur le ru tenuz a cens dudit monseigneur l'abbé. Item quatre arpens un quartier de terre assiz a la Croyx Dame Jehanne. Item deux arpens et demy a Jonchereux. Item un arpent aux Monceaulx. Item deux arpent et demy au Fossé Emengart. Item un arpent en Valtioust. Item cinq quartiers en Saillevert en Fosse les dictes six pieces de terre tenues a champart. Item demy arpent de terre au lieu dit aux

Plastres. Item deux arpens aux Noes Saligot. Item la mairie dudit Tremblay avecques ses droiz et appartenances tenuz en fief dudit monseigneur l'abbé de Saint Denis qui prisez ont esté XVI livres parisis dont il en est esheu a la part dudit maistre Jehan dix livres parisis et a remporté ledit maistre Jehan hors part pour et a cause de aaisnesse a cause du dit Guillaume l'hostel aux tournelles encloz de murs ainsy que il se comporte assiz audit Tremblay et un arpent de pré ou jardin tenant audit hostel tenu en fief du dit monseigneur l'abbé de Saint Denis. Item sept mesures ou environ assis environ ledit hostel tenuz a cens ou rentes du dit monseigneur l'abbé, chargé de sept septiers d'avoine et XIII chappons et XIII pains ausquelles mesures ledit Jehan es noms que dessus a renoncé et par ces presentes renonce, pour les charges dessus dictes que icelles mesures doivent. Et au lot et partie dudit Jehan es diz noms pour et a l'encontre de ce que dessus dit est sont esheu seront demourront les heritages et possessions qui sensuivent. Cest assavoir, quatre arpens et demy de terre en une piece assis en Saillevert en Fosse du costé devers Tremblay. Item cinq arpens en une piece au lieu dit de Saint Moyenne du coste devers la Vilette. Item deux arpens et demy sur la Rideaue. Item neuf quartiers de terre et deux arpens de saulsoye en une piece au lieu dit aux Russeaux. Tout et tenu en fief de Boort de Nantouillet. Item trois arpens au dessoubz du Luat du coste devers la Vilette. Item deux arpens a la voie Saint Pere. Item sept quartiers de terre au dit lieu de la voie saint pere tenant a maistre Guillaume le Vestot. Item arpent et demy au chemin Saint Denis. Item sept quartiers en Valtioust. Item deux arpens et demy aus Voieux tenant a la cousture Saint Denis. Item arpent et demy en Val Tioust. Item deux arpens et demy a la Frete aux Moynes tenuz de cens de Mitry de tel seigneur comme l'en veult advouer. Item trois quartiers a la Croix Dame Jehane. Item deux arpens et demy a la Noe aux Truans tenuz a champart. Item trois arpens a la Longue Rigone moittié a cens et moittié a champart. Item trois arpens a la Fosse Guerry moittié a ecus moittié a champart. Item un quartier en Val Thioust. Item arpent et demy en Pissefourment. Item six livres parisis sur ladicte mairie de Tremblay avecques les droiz adict appartenant. Duquel partaige ainsy fait les dictes parties chacune en droit soy es noms que dessus fait tindrent a bien contens et agreez et en quiterent et quittes clamerent a tous jours l'un deulx l'autre sauf que si en un lot avoit aucune chose qui faict a autruy ou que empeschement y faict mise en cause de l'autre, ou parce qu'il ne deust estre mis en partaige l'autre part en seroit tenue pour sa porcion et pour estre convenu sur ces choses et sur toutes leurs circonstances et deppend le dit Jehan le Truant eslut son domicile en l'hostel de Clement de Villeparent son oncle a la bretesche pres de la montjoye voulans et accordans que tous exploiz de justice faiz au dict hostel en son absence soient dautelles force et vertu come se faiz estoient a sa personne. Lequel partaige et toutes les choses et chacune en ces presentes lettres contenues et escriptes les dictes parties es noms que dessus chacune endroit foy et pour tant comme a lui touché jurerent et promiserent par leur sermens et par la foy de leurs corps pour ce corporellement baillier es mains des diz notaires jurez comme en la mettre tenir garder enteriner faire et accomplir fermement bien loyallement a tous jours perpetuellement sanz enfreindre et sanz aler venir encontre par eulx ne par autres ores ne au temps advenir pour raison d'ignorance, d'erreur de decevance ne autrement comment ne pour quelque cause que ce soit par les manieres que dessus. Et rendre paier et restituer a plain et sanz plet l'une part a l'autre tous coux despens, dommages, mises, fraiz et interestz qui seroient faiz encouruz et soustenuz de l'une dicelles parties par la deffaulte et coulpe de l'autre dont le porteur de ces lettres sera creuz par son simple serment sans autre preuve faire ne tauxacion de juge faict requerre ne demander. Et pour toutes les choses dessus dites et chacunes dicelles

tenir garder enteriner et accomplir de point en point en la maniere cy dessus sont escriptes les dites parties es noms que dessus chacune pour tant comme a l'un touché, ont obligé et obligent l'une a l'autre et l'une envers l'autre eulx leurs hoirs, tous leur biens et les biens de leurs hoirs meubles et non meubles presens et advenir quelz quiz soient, lesquelz ilz soubzmisrent du tout quant a dire pour preuve vendre, saisir, arrester, exploitier a tel fuer telle vente par nous nos successeur prevostz de Paris et par toutes autres justices soubz que jurisdiction ilz sont ou pourront estre jusque a plain accomplissement de toutes les choses dessus dites et de chacune dicelles. Rençonçant du tout quant a dit expressement les dites parties par leurs diz sermens et foy a toutes exceptions, decepcions, de ma,l de fraude, d'erreur de lesion et de circonvention. A toutes barres, cancelles, cavillations et oppositions a dit que les dictes parties ou lune dicelles puissent dire elle ou lune dicelles avoit este deceues ou baretees en faisant passant et accordant ledit partaige et les choses dessus dites ou icelles avoir esté autrement passees et accordees que escriptes ou escriptes que passees et accordees. A toutes impetracions et dispensacions faites ou a faire et a toutes autres choses tant de fait come de droit de us ou de coustume, quy contiennent ces lettres ou aucunes des choses contenues en icelles pourroient estre dictes ou proposees et especialment au droit disant general renonciation non valoir. En tesmoing de ce nous a la relation desdiz clers notaires jurez avons mis aces lettres le scel de la dicte prevosté de Paris. Ce fut fait passé et accordé l'an de grace mil trois cens soixante et huit le samedi xxiiii^e jour du mois de fevrier, et estoient aussy signees. V. Chaon J. Ferrebont. Et nous a cest present transcript avons mis le scel de la dite prevosté de Paris l'an et le jour dessus premierement diz. »